

**Mohd Rafizi Buat Tuntutan Balas Terhadap Shahrizat  
Bernama  
30 Mac, 2012**

KUALA LUMPUR, 30 Mac (Bernama) -- Pengarah strategi Parti Keadilan Rakyat (PKR) Mohd Rafizi Ramli membuat tuntutan balas terhadap saman RM100 juta Menteri Pembangunan Wanita, Keluarga dan Masyarakat Datuk Seri Shahrizat Abdul Jalil berhubung isu projek Perbadanan Fidlot Nasional (NFC).

Mohd Rafizi mengemukakan tuntutan balasnya itu pada 8 Mac lalu di Mahkamah Tinggi di sini dengan mendakwa Shahrizat melancarkan serangan peribadi dan berdendam terhadapnya semasa berucap di perhimpunan Agung Wanita UMNO pada 30 November tahun lepas.

Pihak yang menuntut mendakwa bahawa kata-kata Shahrizat itu telah diterbitkan semula dalam laman web, media cetak dan 'online' yang membawa maksud Mohd Rafizi tidak jujur, tidak setia, penderhaka dan pengkhianat kepada bangsa dan agama.

Antara yang dituntut Mohd Rafizi ialah gantirugi am, gantirugi teruk dan gantirugi teladan.

Sementara itu, Pesuruhjaya Kehakiman Vazeer Alam Mydin Meera yang mendengar tuntutan itu hari ini, menetapkan 12 April untuk pengurusan kes.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=655947>